



# wantok

NESENEL

Niuspepa bilong ol Papua Niugini stret


Namba 211

Bilong wik i stat long Sarere, 25 Mas 1978

Prais 10t.



## YUT





Poto antap i soim tupela nupela dikon i sanap wãntaim Bisop Meredith, em Engliken bisop bilong ol ailan. Ol i sanap long liklik ailan Kaptomete long

Wes Nu Briten.



Hia bisop i sanap wãntaim sampela pris na dikon bilong Engliken Sios. Kirap long lephan yu lukim: Pater Stephen Moi, Dikon-

Rupert Varai, Dikon Cornel Aisum, Bisop Meredith Dikon Thomas Kaikmata, Pater Thomas Kataka, Pater Ambrose Geremus, Pater Peter Guimi, Pater

Giles Ganasa, Dikon Athanasius Anda, Pater Julius Ayong.

Em i namba wan taim sampela Kaptomete i bin kamap dikon.

## Mun bai tudak



Long biknait tru namel long Gut Fraide, 24 Mas na Sarere, long moning-taim tru, bikanit yet bai mun i go tudak inap long wan aua hap. Dispela bai stat long 1.37 klok long biknait na i go inap 3.08.

Poto long lephan i soim bai mun i luk olsem wanem taim em i wok long lusim raun bilong em. As bilong dispela senis em tu yu ken lukim long piksa. I olsem: graun i stap namel long san na mun na i haitim mun. Em tasol.

Em i no samting bilong pret. Bai ol i lukim tu long Australia, Yurop, Esia, na Afrika.

**wantok**  
National Weekly in Melanesian Pidgin

National weekly in Melanesian Pidgin.

Editorial Offices:  
P.O. Box 1982  
Boroko

Phone: 25.2214  
25.2552  
Telex: NE 22213

Branch Offices:  
Wewak  
Phone: 86.2479

Wabag  
P.O. Box 111

Advertising:  
In P.N.G.  
Ms. Peiny Donald  
Phone: 25.2214

In Australia:  
Kevin Engel  
8 Duraba Pl.  
Caringbah (2229)  
Phone: 525.6263

Subscription Rate:  
Annual: K8.00



## LAIP BIHAIN LONG DISPELA LAIP

Em i nem bilong wanpela buk bilong Dokta Moody bilong Amerika. Na wanpela saveman bilong Jemani tu i bin raitim wankain buk, na i gat nem: "Yu Pilim Olsem Wanem Taim Yu Dai?"

Insait long dispela tupela buk, dispela tupela saveman i bungim stori klostu 300 pipel i bin mekim, bihain ol i dai pinis tru inap long 10 minit samting na i bin kam bek long laip.

Ol dispela pipel i bilong kain kain ples na kantri na tok ples, tasol planti tok tok bilong ol i wankain. Tupela saveman ya i bin skelim na lukim na tupela i kalap nogut.

Nau long dispela taim bilong Ista, tingting bilong ol Kristen i go long indai na kirap gen bilong bodi. Kirap bek bilong Jisas yet i no bin stori long ol samting em i lukim long arasait . . . . Tok bilong Sen Pol long 1 Korin 2,9 tu i no helpim mipela. Em i rait: "Ai i no bin lukim, na ia i no bin harim." Tasol nau mipela i gat sampela man i bin lukim arasait pinis na i stori. Em hia sampela samting ol i bin lukim na pilim.

Olgeta dispela pipel i bin pilim gutpela tasol bihain long indai. I no gat wanpela i gat pen o sori o wari o pret. Nogat tru. Ol i pilim ol i ausait long bodi o skin bilong ol - na ol i lukim ol dokta na nes i hatwok long skin bilong ol i dai pinis na i laik bringim bek long laip.

Insait long ol minit ol dispela pipel i stap arasait long dispela laip, ol i pilim hepi tu, na fri tru, na ol i no pas long wanpela samting. Ol i pilim bikpela laik. Ol i no laik kam bek long laip na long bodi bilong ol.

Bihain ol dispela pipel i stat long pulim win gen na hat bilong ol i stat long wok, ol i no save pret moa long dai. Oltaim ol i tingting bek long ol samting ol i bin lukim na pilim na ol i laik go bek. Ol i tok, long dispela taim bodi bilong ol i pilim narakain - olsem i no gat hevi. Ol i pilim planti pipel nabaut long ol i laikim ol moa moa yet. Ol i bungim sampela pipel i bin dai pinis longtaim bipo.

Na wanpela samting olgeta ol i bin pilim, em i wanpela bikpela strongpela lait i karamapim ol. Em i lait olsem san, tasol i no pen. Ol i pilim dispela lait i gat laip. . . . . na em i laikim ol. . . . . na ol i pilim dispela laik . . . . . na i gat ol naispela kala long dispela lait. . . . . na wanpela musik i pilai isi isi i kam long dispela lait. . .

Lait na laip na laik - em tripela bikpela samting long bilip bilong Kristen. Em tripela bikpela tok long Baibel. Ating dispela stori bilong 300 daiman i bin kam bek, i ken strongim bilip bilong mipela long gutpela laip bai kamap bihain long dispela laip.

# Hepi Ista

# YUT PROGRAM

Mista Pato Kakarya, Minista bilong bosim olgeta wok wantaim ol yangpela pipel, i bin autim tingting bilong em-long mekim samting tru long stretim wari bilong ol planti yangpela pipel i raun nabaut nating na i no gat wok.

Em i bin tok olsem, inap long planti yia ol man i bin mauswara na toktok planti long ol dispela wari. Tasol i no gat planti samting tru i bin kamap. Nau Mista Kakarya i laik taitim bun tru long kirapim olkain we na pasin na wok na program na projek long helpim ol yangpela pipel. Mista Kakarya i strong long dispela samting: olgeta program bilong developmen insait long het gavman na long ol provins, i mas gat ol yangpela pipel insait long en, i mas givim wok long ol. Em i tok em i laik singautim planti man bilong helpim tingting bilong em, na givim moa aidia yet long em.

Het aidia bilong em i olsem: Dispela kantri i gat bikpela grup yangpela pipel i raun nating, i laik



painim wok. Ol papamama na famili i kros long ol long wanem ol i aut long skul. Na planti i painim trabel long wanem ol i kros na bel nogut. Mista Kakarya em i ting ol dispela lain pipel i bikpela samting tru bilong kirapim planti kain wok na smol bisnis na projek long ol ples. Em i ting gavman i mas wok pastaim long kirapim ol dispela kain projek na program long ples, na i no lus tasol long olkain faktori na bisnis i stap long ol taun.

Mista Kakarya i laik lukim ol dispela samting i kamap:

a) Kirapim wanpela Nesenel Yut Bot bilong stiaim tingting bilong dipatmen bilong em na gavmen long ol samting bilong ol yangpela pipel. Long Nesenel Yut Bot i mas gat olkain saveman bilong gavman na ausait long en, kain manmeri i gat save long pasin bilong wok wantaim ol yangpela pipel.

b) Kirapim provinsal Yut Bot i wankain long nesenel bot, tasol i wok insait long wan wan provins, na i pasim wantaim olkain yut wok bilong provins. Provinsal Yut Bot i mas

helpim go het olgeta kain grup i save wok wantaim ol yangpela pipel.

c) Wokim provinsal yut forum, em i olsem ples we ol tokman bilong ol yangpela pipel yet i ken autim laik na tingting bilong ol long olkain we bilong helpim ol yet.

d) Statim wanpela spesel ofis insait long dipatmen bilong em yet, long bosim olkain wok wantaim ol yangpela pipel.

e) Wokim wanpela spesel program bilong trenim ol yangpela man long kamap lida; dispela program bai



gat 6-pela spesel saveman bilong ranim.

f) Long wan wan provins statim komyuniti developmen senta, we ol i ken givim spesel trening na save long ol tisa, na ofisa bilong provins i wok long trenim ol yangpela pipel.

g) Helpim olkain yut grup long putim wok bilong ol insait long bikpela program bilong gavman, bai ol i ken kisim mani long gavman bilong mekim go het wok bilong ol.

h) Wokim wanpela Sitisen Difens Fos. Em i wanpela lain yangpela man i tren long sampela wok bilong ol soldia, tasol em i no soldia tru. Em i sambai -

sapos taim bilong pait o woa i kamap, em i skul pinis. Olgeta man i winim 18 krismas pinis i mas insait long dispela sevis. Ol man i no gat wok bai mas stap insait inap long wan yia stret long dispela sevis na i mas skruim trening inap wan yia moa wan wantaim long mun. Ol man i studen o i wok, i mas mekim wankain trening inap tu yia. Tasol long wan wan de bilong mun tasol, i no olde.

Program bilong dispela sevis bai minista bilong yut na minista bilong ami na minista bilong plis i wokim.

i) Statim gen ol Kadet. . . i olsem bipo. Hia sampela studen long ol haiskul na arapela grup i laik redi long tren long kamap ofisa long ami, i ken join long long laik bilong ol. Ol kadet i aninit long 17 yia yet. Ol i save tren wan wan de long mun, na mas, na holim raifel na tren long en na long ol lo bilong ami na ofisa bilong en.

j) Yumi no ken lusim ting long ol meri i kam insait long yut wok. Ol tu i ken skul moa long wok bilong ol ofis na helt na welfe.



k) Gavman mas helpim olgeta kain grup i mekim wok wantaim ol yangpela pipel, olsem: Sen Jon Embulens, YMCA, YWCA, YC, Skaut, Gaid. Na tu ol (i go moa long pes 6)





## RAUSIM NAMBIS- MAN LONG SALIM BUAI LONG HAILANS MAKET

Dia Edita - Plis inap long yupela larim hap liklik spes long mi long putim liklik wari bilong mi? Hia mi strongim toktok bilong poroman Harry Tokey, Kitip/W.H.P. Long ol Hailans save baim buai na salim long hailands maket.

Mi laik helpim toktok bilong em bikos mi tu mi bin lukim wanpela rabis pasin i kamap long Goroka maket we ol pipel save salim buai. Mi laik askim olsem. Dispela buai save kam we na ol hailans i save salim long maket? Na tu olgeta maket insait long hailans, em maket bilong ol hailans tasol long ol tasol salim kaikai na buai o bilong yumi olgeta nambisman na hailans wantaim?

Long Fonde namba 24 de bilong mun Februari 1978, mi bin i go long Goroka maket long baim buai. Dispela taim mi bin lukim 4-pela man bilong Makam na wanpela bilong Madang i kam long salim buai bilong ol long Goroka maket. Tasol sampela man na meri bilong Goroka ol i wok long salim buai, kirap na rausim ol 5-pela man olsem bai ol i no ken salim buai bilong ol long Goroka maket.

Ol i tokim ol olsem bai ol i mas painim ples bilong ol long salim buai bilong ol. Ol i tokim ol olsem ol i mas baim maket long K10 pastaim long ol i salim buai. Sapos i no gat bai ol mas karim buai bilong ol i go long Lae na salim.

Dispela 5-pela man i bin sanap wantaim mekpas buai bilong ol olsem 15 minit olgeta. Dispela pasin mi lukim na i no stret long tingting na bel bilong mi. Mi sori na wari nogut tru taim mi lukim dispela rabis pasin.

Mi tokim yupela stret, ol wantok, insait long hai-

lans na insait long Goroka taun, traim na planim buai. I no hatwok long planim buai, planim olsem yu save planim kapis. Insait long Goroka mi bin raun pinis na mi no lukim wanpela buai i sanap samting mi lukim em kavivi tasol. Traim na salim ol kavivi insait long maket.

I gutpela sapos olgeta nambis o husat nambisman i laik salim buai mas salim long bek na prais bilong bek buai mas i go antap olsem K80 o K100.

Sapos husat wantok i lukim dispela toktok bilong mi na traim long strongim liklik em bikpela amamas tasol. Yu husat hailans lukim dispela pas na guriam bel bilong yu traim na dringim kol wara o rait long Wantok bai mi lukim. Mi amamas tasol long lukim bek bilong pas. Rait long Wantok bai mi lukim. Em tasol.

David N. Kao,  
Siassi Ailan/Lae.

## MERI MAS TILIM MANI

Dia Edita - Nau mi laik autim o helpim tok bilong brata, Bonny. N. Kuakam bilong Rabaul. Brata, mi ting olsem tok bilong yu i stret tru.

Hia long Wewak mi save lukim planti man i save mekim olsem na i no stret tru long tingting bilong mi. Sapos yu man olsem yu mas kisim mani na bringim stret na givim mani long meri bilong yu. Bai meri i givim yu hamas mani, okei em i laik bilong yu. Yu ken go dring long hotel long laik bilong yu.

Em i orait. Taim yu go spak na taim yu kam bek yu amamas tasol long kaikai.

Em tasol sapos yu husat yu laik bekim pas, rait tasol i go long Wantok Niuspepa. Tenkyu.

Anna Angu,  
Kaindi Viles/Wewak.

## WATPO SAMPELA ODELI NO WOK

Dia Edita - Orait nau mi laik traim bekim pas bilong yu, o ol askim. Yes wantok long toktok yu bin tingim na yu toktok, em i tru.

Long sampela hap ol A.P.O. i save mekim olsem. Ol i save lusim sampela aua long go aut na mekim wok bilong aua gavman i makim pinis long stat wok na pinis wok. Mi yet tu mi harim na em sem tru long mipela A.P.O.

Tasol liklik tok bekim bilong mi em olsem. Sampela wanwok ya, ol i olpela tumas na ol i wik. Long wanem ol i bin sevis pinis long wok doktaboi. Sampela ol i eria A.P.O. i save lukautim ol i no save givim em fri kaikai, em i save stap long poket bilong em. Nogut em i liv na sampela i lusim ting long tok save long ol pipel o eria em i sevim.

Nogut em i go long pinis bilong mun long bikpela Haus Sik long bringim ol ripot. Nogut em i les tasol long wok. O samtaim em i ken go lukim arapela man i sik nogut tru.

Tasol em ol dispela ol bekim i go long no Wanda Wai, A.P.O. i lusim Et Pos bilong em. Yu mas kisim gut toktok long husat i man bilong tok stret o nogut yu askim wanpela man i gat tu, tri tingting. Sapos em i gat wanpela long 5-pela risen wai na em i lusim Et Pos i go em i gat rait tru. Tasol long namba 5 em i no gutpela wokman tumas na em bai no gat rait, o gavman bai baim em nating.

Francis Waipe,  
Mukili/W.S.P.

WANTOK  
BOX 1982  
BOROKO

## MAN PASIM KLOS MERI

Dia Edita - Mi bin ritim wanpela Wantok Niuspepa long de namba 25 long

mun Februari 1978. Em brata hia E.G. Gin i bin raitim wanpela pas na i tok ol meri i save yusim ol samting bilong ol man.

Brata, mi gat bikpela amamas tru long ol toktok bilong yu na tu mi laik sapotim ol dispela toktok bilong yu.

Mi ting olsem taim ol tumbuna bilong yumi na ol papamama bilong yumi ol i no save yusim ol klos nambaut, nogat. Ol i save yusim samting bilong ol stret. Papa i save pasim malo na mama i save pasim purpur. Yu ting wanem sapos mama i kisim malo bilong papa na papa i pasim i luk gutpela? Olaman, mi ting em i luk nogut tru na tu i luk fani.

Na tu long nau yet ol man i no save putim ol sket o klos bilong ol meri, nogat. Ol i save putim stret ol klos bilong ol man stret. Plis tru ol susa traim na yusim het.

Rafael Kerom,  
Mt. Hagen.

## PIPIA PASIM AI

Dia Edita - Mi laik bekim liklik tingting bilong mi long pas bilong Bonny N. K. Kuakam long Rabaul. "DRING OLSEM KAU."

Dispela wari bilong yu i no inap long mipela ol manmeri ritim long nius bai stretim, nogat tru, wantok. Em i wari bilong tupela marit. Meri mas stadi gut long man na man tu i olsem. Bai sindaun bilong tupela bai i orait.

Wari bilong dring bai i no inap kirapim wok long kantri bilong mitupela. Sampela man i save spak bilong wanem i mas i gat liklik kros pinis long san na i bel hat long meri olsem na em i laik apim 3-pela bia tasol. Orait, i laik kros pait wantaim meri samting olsem.

Olsem mi tok pinis samting bilong tupela marit em i bilong tupela yet.

Sapos yu gat Baibel Bu orait yu opim long rait stap long (Matyu 7:1-5 "Yu rausim pipia long a bilong yu pastaim yu tok tok long narapela pren bi long yu." Larim God sasim yum. Tenkyu.

Ufung Ibu  
La

## SANGUMA LO

Dia Edita - Mi wanpel Baibel Tisa i wok lon autim gutnius long ol pipe long ples. Pleš mi stap lon em Nandri sait long Gumine. Nem bilong mi Pete Bin. Mi i gat wanpela war nogut tru ol viles gavman ol i putim wanpela lo strong tru long sanguma. Ol i putim bikpela pe i gat antap tumas.

Ol i tok tru i gat sangu ma na kilim ol pikinini na long ol manmeri tu bamba yumi putim strongpela lo. Ol i tok olsem na wokim ol tu i tok i gat lo i tok orait yupela i ken kot long dispela sanguma na kisim pe.

Em-mi wari tru bihair wan wan man i dai, oltair ol bai kisim pe long olgeta man o olsem wanem? Ba ol i tok olsem, long sangu ma lo, buk bilong gavman i gat o no gat.


Mi askim yupela tok save long mi. Mi no save. Em o maušwara, nogut ol mekim olsem i go i go kantri bilong yumi Papua Niugini i bagarap ya. Watpo ol i mekim dispela ol viles gavman i wokim?

Mi amamas tru long narapela samting ol wokim strongpela lo. Ol tambu long kain kain trik. Ol wokim ol tambu na kotim na baim kot na sutim i go long kalabus na baim K100 kot tu. Em ol wokim tru tasol ol gen ol i bilip long sanguma. Em i no stret. Dispela i laik stilim pe bilong arapela wantok em yupela stretim gen long ol viles gavman.

Em tasol liklik wari bilong mi. God bles yupela.

Peter Bin,  
Gumine/Simbu

# pasin long wok wantaim yut



Insait long Papua Niugini wanpela grup i save mekim planti wok wantaim ol yangpela pipel, em Y.C. Long ol oiktaun olsem Madang na Goroka na Hagen na Wewak, na Lae, senta bilong ol Y.C. i bikpela moa. Na ol i gat moa olsem narapela 60 senta i stap nabaut long ol viles na misin stesin bilong Katolik Sios na Wabag Luteran io tu.

Y.C. - em i min "Young Christians". Em i olsem "Ol yangpela Kristen". Ol gat moa olsem 2000 nembra long Papua Niugini.

Long bikpela kibung bilong ol Februari, ol i bin utim tingting bilong ol bi-ong dispela yia. Ol i laik enis nau. Bipo ol i bikpela grup tasol, na i bihainim ve na pasin na tingting bi-ong helpim ol yangpela pipel long pasin bilong ol usait kantri. Bipo ol i tingting planti long sosol na spot. Ol waitman ol-aim i ranim ol na ol i bikpela grup moa.

Nau ol i laik wok olsem smolpela smolpela grup insait long viles na ples na long misin stesin. Na ol lokal lida yet i mas ranim ol. Na ol i mas gutpela Kristen grup em i astingting.

Ol Y.C. i gat sampela wari namel long ol. Tasol ol i pilim em i olsem wari bilong ol yangpela pipel i go bikpela nau. I no samting bilong pret. Em i samting bilong kamap bikpela man na meri. Long Y.C. tu i wankain.

## RET KROS GIVIM SUSU

Long olgeta Tunde, Ret Kros Sosaiti long Port Moresby i save tilim 460 katon nupela susu long ol 900 sumatin bilong Hagara Komuniti Skul klostu long Hanuabada. Olsem tasol ol i laik givim gutpela kaikai tru long ol yangpela pipel i mas kisim strong bilong gro na stadi gut.


man i bin givim K19,000 long ranim ol dispela wok Y.C. Na tu sampela ovasis grup i save helpim ol long dinau na mani, em ol i save putim insait long Invesmen Koporesen na yusim winmani bilong ranim-wok bilong ol.


*Poto long raithan i soim Minista bilong bosim ol wok wantaim yut, em Mista Pato Kakarya, em i memba bilong Wapenamanda Open long Enga.*


*Em i save planti long wok wantaim ol yangpela pipel.*

*Poto daunbilo i soim ol sumatin meri long Noten Provins i skul long pasin bilong wokim bilum na ol paus samting.*

Tupela poto i kam long Opis ov Inpomesen.







## BRIDGESTONE

LUKIM DISPELA MAK  
EM I MAK BILONG

### Namba Wan Taia

### Bilong P.N.G.

N.G.G. TRADING COMPANY  
P.O. BOX 459,  
LAE,  
PH. 42 3122

# Noten Provins soim rot

Wanpela gutpela eksampel bilong dispela kain wok Mista Kakarya i tok long en, yumi ken painim long Noten Provins.

Insait long 3-pela yia nau ol komyuniti dievelopmen ofisa i bin statim 52 yut grup na bungim ol insait long Yut Developmen Bot bilong provins. Em hia nem bilong sampela grup i gat biknem: Motage bilong ples Pongani, Nataba bilong Erero, Embusuba na Yega bilong Gona, Sairope na Hanjiri bilong hap bilong Kokoda rot, Manau na TK bilong loma.

Namba wan wok bilong ol dispela grup em i long givim kain kain wok long ol memba, bai ol inap helpim ol yet na helpim komyuniti, na ol i no skrap long go raun nating long ol taun tasol.

Ol yangpela pipel bilong ol yut grup i save insait long olkain wok bilong lokal viles kaunsil na ol sios. Ol i save helpim ol pipel i no inap long wokim haus na gaden bilong ol. Ol i gat stringben bilong ol stret na i save winim mani long pilai long ol pati. Ol tu i gat spot kanival bilong ol stret.

Na bilong mekim ol dispela samting ol i no save kisim sampela mani long ol lokal gavman kaunsil o provinsal gavman.

## ol skwata laik kibung

Bikso sentral provins gavman i ting long salim ol skwata i go bek long ples bilong ol, ol skwata yet i bin kibung tupela taim long Saraga Komyuniti Senta. Ol i laik, bai siti kaunsil na sentral provinsal gavman na nesanel gavman tu i singautim sampela tokman bilong makim ol skwata tu, taim ol i laik wokim lo egens long ol.

Tupela tokman, Taria Miro na Simi Maka, i askim gavman long larim ol i sindaun long sampela graun nating bilong gavman. Ol i laikim tu gavman i mas kirapim sampela wok na bisnis long as ples bilong ol, bai ol i ken go bek na painim wok. Ol i tok gavman i no save helpim ol Galp na ol Goilala na ol Simbu.

Ol i tok tu, ol papa bilong graun yet i bin orait ol i ken sindaun long graun bilong ol; mipela i save helpim ol komyuniti na sios wok bilong ol. Ol tu i mas insait long kibung we gavman i traिम stretim ol skwata wari.

## YUT PROGRAM MAS GO HET

(i kam long pes 3)

yut na sevis klap bilong Apex, plis, Laion, Roteri.

i) Yumi mas makim wanpela "Yanpela Pipel Wik" - bilong stiaim ol ai na tingting i go long ol yangpela pipel, mekim olkain pilai na spot bilong bungim wantaim ol yangpela pipel.



lo. Olsem em i nogut ol bikpela man i tingim ol olsem pikinini nating.

Go het bilong dispela kantri i stap long han bilong ol yangpela pipel bilong tude. Ol yangpela bilong tude, em ol lida bilong tumora. Ol papamama bilong tude i givim dispela kantri i go long han bilong ol yangpela pipel. I gut yumi trenim ol gut nau tasol.




m)Skulim ol provinsal na lokal gavman long yusim ol yangpela pipel bilong ol. Sapos ol yangpela pipel i gat inap yia long baim takis na vot, em i min ol i bikpela pinis long ai bilong

Sapos yu gat sampela gutpela tingting long ol dispela samting na pasin bilong helpim ol yangpela pipel, Mista Pato Kakarya, i laik yu rait i go long ofis bilong em, long Box 2606, Konedobu.....


## Aveling Barford Pacific Pty. Ltd. Representing the world's leading automotive manufacturers.

Ume St. Gordon, Port Moresby. Phone 257166, 257908  
Morobe Ave. Lae. Phone 424188, Mt. Hagen. Phone 521015  
Stones Automotive Services, Kieta. Phone 956093  
Malaguna Motors, Rabaul. Phone 921751



### NACHI

Bearings—automotive industrial machinery. Roller, ball, taper bearings.  
Extra small radial ball bearings.  
Single row deep-groove ball bearings.  
Double-row self-aligning ball bearings.  
Tapered roller-bearings.  
Cylindrical roller-bearings.



### RYCO-FLEX

Hydraulic hose, assemblies, couplings, adaptors.






Ol ofisa bilong Saraga Komyuniti Senta long Port Moresby i kisim mejistret bes bilong ol.

Long antap: Lephon i go long raithan em Mista Sara-ga Sina (Mejistret) Mista R. Kalo (Klak), Mista Karoro Beni (Mejistret), na Mista Dennis Haora (Mejistret).


Daunbilo: Ol Pis ofisa long lephan i go long raithan em: Mista Willie Heni, Mista James Kopekoro, Mista Mathew Keve, Mista Jim Aia, Mista Amuma Morona, na Mista Nanaba Mota. Na Mista Buri Kida, wanpela pis ofisa tu i no stap long poto. Man long raithan kona tru em Mista Uru Tau Gwing, em i lo seketeri bilong jastis.

Saraga Komyuniti Senta long siks mail - ol meri Simbu, Papua, Goilala, i bung na wok wantaim.

# insait Papua



Poto antap i soim ples Pinapaka long nambis bilong Papua klostu long Yule Ailan. Bikpela win i bin tromoim daun ol kokonas na rausim kapa bilong ol haus na bagarapim ples tru. Tasol ol pipel i no laik ranawe long wanem bun bilong ol tumbuna bilong ol i stap, na em i nambawan ples bilong painim bikpela kindam.




## TULTUL TITAN



Taim yu wokim TITAN banis no ken lusim tingting long wokim STRENA. Em bai holim kona strong tru. Sapos yu no putim strenta bai banis i slek.



Titan (NG) Pty Ltd. - P.O. Box 25, Lae. Ph. 42.3988 42.3497



# SUNAM KONA

## BALUAN VILES KOT MEKIM SAVE

Long namba 17 de bilong mun Februeri 1978. Baluan Viles Kot i bin salim wanpela man i go long kalabus inap 3-pela mun. Man ya em Benny Sikin bilong ples Parioi. Long wanem kot i sasim em long paitim nating papa bilong em.

Man bilong harim kot, i tokim Mista Sikin olsem em i no stret long ai bilong lo long yu paitim nating papa bilong yu, Mista Popot Narambuai. Long kisim save yu mas go long 3-pela mun kalabus.

## NO AMAMAS LONG EDUKESAN DIPATMEN

Wanpela pablik sevan i

wok tu wantaim Edukesen Dipatmen, i tokaut pinis olsem em i no amamas long edukesen dipatmen long wok insait long Manus Provins. Man hia em Mista John Komet bilong Provinsal Edukesen Bot i no save lukluk gut long namba bilong ol tisa husat i stap insait long Manus Provins.

Ol provinsal edukesen bot i save kisim ol nupela tisa i kam insait long provins we i kisim ples bilong ol narapela tisa husat i bin wok pinis long provins.

Mista Komet i tok tu olsem dispela pasin i no gutpela tumas long edukesen dipatmen i no save skelim gut namba bilong ol tisa save kam insait long provins we planti tisa insait long Manus Provins i stap nating long sampela yia i go pinis.

## WOKMAN NO GO LONG WOK

Fainens komiti bilong Manus Spot Klap i bin toktok strong long pablik sevan long Manus Provins. Em ol i save kisim pe long pe de na i no save go bek long wok long apinun.

Olpela memba bilong palamen na Presiden bilong Manus Spot Klap, Mista Pika Kasau i bin tokim ol komiti olsem ol komiti i mas lukluk long pablik sevan save kisim mani long moning i go stap dring long klap na i no save go bek long wok long wan klok.

Em i askim ol Fainens Komiti long mekim sampela samting long stopim dispela kain samting i no ken kamap long Manus Provins. Dispela kain pasin inap long daunim develop-

men bilong provins na kantri bilong yumi PNG.

## KLAP HELPIM MANUS HAISKUL

Eksekutiv Komiti bilong Manus Spot Klap i bin tok orait long ol sumatin bilong Manus Provinsal Haiskul long bungim ol emti botol long kisim mani bilong skul. Dispela mani bai ol i yusim long mekim sampela wok insait long skul.

Ol dispela toktok i bihainim wanpela askim i kam long hetmasta bilong Manus Provinsal Haiskul. Mista Cole Maiden, Presiden bilong Klap na olpela memba bilong palamen. Mista Pika Kasau wantaim ol komiti bilong Manus Spot Klap i tok orait pinis long givim K3.000 kina i go long



Manus Provinsal Haiskul olsem presen bilong dispela skul.

## OVASIS PIPEL

Provinsal Memba bilong Manus, Mista Michael Ponds i bin toktok strong long ol memba bilong provinsal gavman insait long provins long lukluk gut long ol ovasis pipel i kam wok insait long Manus Provins.

Ol ovasis pipel i mas wok gut na i no ken paulim ol mani i kam insait long provins em Nesenel Gavman i salim i kam bilong mekim wok long dispela provins. Em i askim strong ol memba bilong gavman i mas was gut long dispela. Sapos ol i no was gut bai planti mani i paul insait long provins na dispela i ken sloim ol developmen insait long Manus.

# Maxell i nem yu ken bilipim. Baim em tasol.



YU KEN BAIM LONG OL DISPELA HAGEMAYER STUA

P.O. Box 673, MADANG  
PHONE: 822445

P.O. Box 1428, BOROKO  
PHONE: 256144

P.O. Box 90, LAE  
PHONE: 423200

P.O. Box 63, RABAU  
PHONE: 922633

P.O. Box 11, MT. HAGEN  
PHONE: 52 1339



# Stori Tumbuna

Wanpela taim wanpela man em i stap long wanpela maunten. Nem bilong em i Kemanemanda. Dispela man em i gat wanpela kain pisin. Nem bilong pisin em i (Kambi) o taragau. Dispela taragau wan-taim man tupela i poro-man gut tru na stap long maunten Kemanemanda.

Ol arapela man i stap klostu long maun ol i laikim tupela. Dispela pisin taragau i flai i go long narapela hap na kisim gutpela kain samting long helpim man bilong em. Em i save kisim mael, paspas, bel o (Matapu), sel kina, gam na ston tamiok na kundu. Dispela pisin taragau i flai i go long ol arapela ples na kisim gutpela samting i kam long helpim man bilong em. Man em i laikim dispela taragau tru.

Wanpela de pisin taragau i flai i go long wanpela ples. Em i lukim ol manmeri ol i singsing i stap. Kwiktaim taragau i kam bek long ples bilong em na tokim man bilong em: "Mi lukim wanpela kain samting long wanpela ples."

Dispela man em i askim em: "Yu lukim wanem kain samting?"

Em i tok: "Mi i tok: "Mi lukim ol manmeri ol i sing-

sing na kalap kalap i stap. Yu laik go singsing long dispela hap o noget?"

Pisin i askim man na man i tok: "Yes, mi laik go singsing."

Man i bekim tok bilong pisin taragau na Taragau i amamas tru long man na em i bilasim em gut tru. Em i go kisim lip tanget na wanpela kain lip diwai ol Enga man i save putim. Dispela lip diwai ol i kolim (Maryoko).

Em i bilas pinis, orait em i lukim man na em i hepi na amamas tru. Em i kolim nem bilong man Pandaiakali Lela. Pisin taragau em i laikim Pandaikal Lela. Olsem nau pisin em i tokim man olsem: "Yu no ken pret na wari. Yu lukim mi, taim mi flai i go. Taim mi flai i go, yu mas bihainim mi na singsing i kam."

Man, Pandaiakali Lela i bilas na em i winim ol arapela man. Dispela pisin taragau em i flai-isi isi i go long ples we ol man i bin singsing i stap long em.

Dispela pisin i flai kamap long ples singsing. Ol manmeri ol i paitim kundu na singsing ol i lukluk long pisin taragau. Nau ol i lukim wanpela man i bilas na singsing i kam baksait. Ol manmeri ol i lukim dispela

## Watpo bilas taragau!



Poto i kam long Opis ov Inpomesen



## ROOK'S RADIO olkain gita, spika

P.O. Box 191, Lae. Phone: 42.4616

man, na bilas bilong Pandaiakali Lela em i winim ol. Olsem nau ol meri ol i holim susu bilong ol yet na wara i kamap long susu. Ol i guria long dispela man na ol i tok: "Mi laik singsing wantaim em."

Yangpela meri ol i pait long ol yet long wanem dispela man em i no inap long ol arapela man. Em i winim olgeta man na meri. Em i singsing i stap na pisin taragau em i go bek long haus na redim kaikai long dispela man. Taim em i redim kaikai pinis, em i kam bek long ples singsing. Em i flai isi isi kam na stap long het bilong man bilong em. Ol manmeri i lukluk na amamas na em i kirap na flai raun long ples singsing na stap.

Taim olsem long apinun em i lukim tupela meri i

pas tru long man Pandaiakali Lela. Taragau i tokim tupela meri olsem: "Watpo yutupela i holimpas tru long brata bilong mi? Lukim, no gat wanpela meri i lukautim dispela man. Mi yet mi save lukautim em. Lusim han bilong yutupela. Mitupela laik go long haus."

Tasol tupela meri i no laik harim tok bilong taragau. Olsem taragau i supim lek bilong em i go long tupela meri. Nau tupela meri i pret na lusim brata bilong em. Em i kisim brata na tupela i flai i go long haus. Narapela meri i katim han na narapela i pulimia bilong em. Tupela i kraikrai stap long ples singsing.

Wanpela de taragau i flai i go long wanpela gaden. Em i lukim 5-pela meri ol i kamautim kaukau i stap. (I go moa long pes 12)

# COLGATE I SAVE STRONGIM TIT BILONG YU



Oigeta de long moningtaim na long apinun yu mas klinim tit bilong yu. Yu mas mekim olsem:

- 1 Putim liklik gris bilong klinim tit antap long liklik brum bilong klinim tit.
- 2 Sapos yu laik bai tit bilong yu i waitpela tru na i strongpela, yu mas klinim tit bilong yu bihain long olgeta bikpela kaikai. Putim liklik brum antap long tit na pulim em i go antap na i kam daun gen, planti taim.
- 3 Nau klinim ol sap bilong tit.
- 4 Yu mas klinim tu baksait bilong tit.
- 5 Taim yu klinim tit, yu mas krungutim tru dispela liklik brum, bai em inap klinim olgeta liklik spes namel long ol tit na rausim ol pipia kaikai long en. Pipia kaikai i mekim tit i sting na i gat hul.


Dispela em i pasin tru bilong klinim tit. Na sapos yu bihainim tru, bai tit bilong yu i klin na i waitpela na tit na maus bilong yu i no ken sting.

<p><b>Bilong strongim tit, yu mas dringim plantim susu, na kaikai ol samting i gat vitamin na gutpela marasin long en.</b></p>	<p>SUSU i gat kalsium na fosforus—em tupela samting i save strongim skin bilong tit. Na tu i gat vitamin A, B, C, na D.</p>	<p>OLKAIN PRUT i gat vitamin A na C.</p>	<p>OLKAIN SAYOR i gat vitamin A na C.</p>	<p><b>Sapos yu no lukautim gut tit bilong yu, bai ol i bagarap olsem:</b></p>	<p><b>GUTPELA TIT</b> 1. Skin 2. Bun 3. Rop</p>	<p><b>WARI</b> Lukaut, nau hul i bin kamap inap long bun bilong tit. Nau yu save pilim liklik gen. Hariap. Go lukim dentis.</p>
	<p>KIAU i gat kalsium, fosforus na vitamin A, B, na D.</p>	<p>MIT i gat fosforus na vitamin B.</p>	<p>PIS i gat fosforus na vitamin B.</p>		<p><b>LUKAUT</b> Wanpela liklik hul i bin kamap long skin bilong tit na skin i staf long sting. Go hariap long dentis (dokta tit).</p>	<p><b>PEN</b> Hul i kamap pinis long rop. Nau bikpela pen moa i kamap. Nau yu mas go lukim dentis.</p>

Yu mas kaikai mit wantaim sayor bilong kisim vitamin A, B, na C.

Lukaut: planti switpela kaikai na loli i save bagarapim tit hariap.

**Colgate gris bilong tit em i swit moa, na i mekim tit bilong yu i waitpela na i strong.**



Tok save i kam long Colgate Palmolive bilong helpim helt bilong tit.

## SKIN PUKPUK

Tripela bisnis grup bilong ol viles long Westen Provins i save salim ol skin pukpuk nau stret long dipatmen bilong gavman i lukaut long olkain abus bilong bus. Na dispela dipatmen yet i helpim ol pipel i kisim gutpela prais long bikpela maket.

Ol i bin salim 261 skin pukpuk na i bin winim K20,400.

Wan wan grup i gat autbot moto, bensin, sol. Na ol i save raun na baim skin long ol viles pipel, tilim sol long ol bai ol yet inap long solim ol skin. Na tu ol i save baim smolpela pukpuk na putim long fam bilong ol. Developmen Beng i bin givim dinau long ol long statim dispela wok.

## WEL PAM

Taim gavman i bin tok save long painim pipel i laik mekim wok wel pam long Isaveni long Noten Provins, planti pipel moa i bin aplai. I gat 131 blok tasol na 2,263 pipel i bin aplai bilong wok long ol.

Taim ol i bin singaut long wokman bilong 481 blok long Biala, ol i bin kisim 1,330 eplikesen.

Planti Papua pipel i aplai nau long ol Noten Provins wok wel pam. Na long Wes Nu Briten planti moa Enga man na Kabwum pipel i aplai pinis. Ol Is Nu Briten pipel i no aplai planti olsem bipo.

## LAIK APIM PE MOA YET

Mista Pita Lus, Minista Bilong Bosim Bisnis, i tok sapos gavman i strong long ol minista i mas lusim olgeta wok bisnis bilong ol, gavman i mas apim moa moa yet pe bilong ol inap olsem: Praim minista: K50,000 long yia, Namba tu praim minista: K45,000 long yia, Lida bilong Oposisen: K35,000, ol minista: K30,000, na ol memba nating: K20,000.

Sapos yu tingting long fotnait bilong ol, em i go olsem: Praim minista K2,000 long fotnait; minista: moa olsem K1,000 long fotnait; na ol memba nating: K400 long fotnait.

# HAMAIJA

(Inap nau stori i go olsem: Katekis Hamaija i statim skul na nau em i resis long rausim pret bilong tambaran long bel bilong pipel. Wampela masalai bilong tri i laik lus nau. Yu ritim stori nau.

Hamaija i no maus liklik. Nogat. Em i brukim dispela ples wantaim, tutaim, no gat sik, no gat trabel i painim em. Nau ol man bilong ples tu i kisim save. Ol i ting, nating mipela pret nating long ples masalai.

Sampela pasin bilong pipel long dispela ples tu i no stret. Hamaija i givim tok klia. Ol i soim em ples we masalai i stap long bus. Na sampela i stap long arere bilong wara Sepik. Dispela ol ples ol tu i tambu tru. No gat man i ken wokabaut klostu long ol. Sapos man i kamap klostu long dispela kain ples em i dai.

Hamaija i skulim ol pipel na i tok, "Save! Dispela ples na bus bilong yupela i wankain tasol long planti ples moa na planti bus na wara moa nabaut nabaut. Ol i wankain tasol. Ol i gat wankain graun, wankain diwai, wankain abus long bus na pis long wara. Sapos ol i wankain olsem, em i bikos wampela samting i wokim ol bilong helpim man i painim kaikai, wokim haus na olkain samting. Gutpela papa bilong yumi ol man, em tasol i wokim ol dispela samting. Bus na ol ples na ol wara i no ples bilong masalai. Nogat. Em ol ples bilong Got tasol."

## MASKI MASALAI

Narapela de Hamaija i go wantaim ol long wok gaden. Dispela taim Hamaija i go pas. Ol i kamap long wampela ples masalai na ol i laik abrusim. Tasol Hamaija i go pas i brukim rot na i wokabaut long ples masalai. Ol man i bihainim em i singaut strong tumas na i laik pasim em. Ol i pret. Tasol Hamaija i no harim. Em i go het, brukim ples masalai na i go olgeta. Em i no pundaun na dai.

## TRIK TRI

Klostu long ples Yessan i gat wampela diwai bilong bus i stap. Em dispela i no diwai nating, nogat. Em diwai tambaran. Em i lapun, draipela tru. Olgeta han bilong em i drai na pundaun, stik diwai tasol i stap. Insait i gat hul na i sting pinis. Wampela han tasol i stap yet i gat laip, i gat blut na i gat lip bilong em. Dispela lapun diwai hia i diwai tambu, bipo yet, tumbuna i kolim olsem. Em diwai bilong tumbuna, em i tambu. Hamaija tasol i no ting olsem. Em i ting dispela diwai i lapun diwai nating, i drai na insait bilong em i sting. Maski em inap long paia-wut.

Ol man bilong Yessan i was gut long en, i no save go klostu long en. Ol i tok sapos dispela diwai i pundaun bambai viles bilong ol i pundaun wantaim. Hamaija i skulim ol, tasol em i no inap i win. Bilip bilong ol pipel long diwai tambaran i strong moa. Ol i pret moa na ol i no save go klostu long en.

## TRI I LAP

Tupela yia i go pinis na Hamaija i wok i stap. Wok bilong em i go het, tasol diwai tambaran i stap, i strong yet. Planti taim Hamaija i go klostu long en, long wanem em i sanap arere long rot taim em i go long ples Brugonovi bilong mekim skul. Dispela diwai tambaran i stap i lap fong Hamaija. Na Hamaija i tok



tri  
masalai

long tingting bilong em. Tru tumas, bambai mi mekim yu pundaun."

Ol manmeri bilong Yessan i go long wok bilong ol, Gaden bilong ol i stap longwe liklik. Hamaija i go long Brugonovi. Nau em i tok, em gutpela taim bilong pinisim dispela hambak bilong tambaran. Em i haitim kanu bilong em long bus. Em i save i no gat man i stap klostu. Tasol maski, em i tok, mobe ta mi haitim gut. Nau em i go klostu long diwai. Em i putim han bilong em na holim diwai." Orait, em i tok, "taim bilong yu i kami pinis."

## TAMIOK I KRAI

Nau em i stat long paitim em long tamiok. Beng, beng, beng. Tamiok i sing, sing, tamiok i kaikaim draipela diwai, pipia i pun-

daun. "Nambawan paia-wut," Hamaija i tok. Wok i no pinis kwik. Tasol nau i gat pipia inap long mekim paia. Hamaija i kisim pipia na bungim insait long diwai. Na em i karim planti moa draipela paia-wut i stap klostu na bungim raun nabaut long diwai. Draipela gras na draipela lip em i putim wantaim. Hamaija i lukim wok bilong em na i amamas.

Nau em i stekim masis na i laitim paia. Paia i lait tasol, i lait strong, na i no gat smok, long wanem em i nambawan paia-wut, i drai tumas. Hamaija i lap, i danis na singsing. Em i lukim paia i kaikaim lapun diwai bilong tambaran. I no inap mekim indai nau. Wok bilong em i pinis, nau wok bilong paia i pinisim tru.

Hamaija i go bek long

kanu bilong em, subim i go daun long riva na pul i go long Brugonovi. Hia em i mekim skul olsem em i save mekim olgeta taim em i kam long dispela ples. Tasol bel bilong em i gut i amamas tumas long em i pinisim diwai hia i stap olsem huk bilong pipel bilong hangamapim strongpela bilip long tambaran. I no gat moa nau, i pinis.

## TRABEL

Longtaim liklik i go pinis nau ol pipel bilong Yessan i stap long wok bilong ol, ol i lukim liklik smok i kirap long ples bilong ol. Ol i save, i no gat man i stap long ples na ol i tingting planti. Nating wampela haus i paia? Tasol ol lapun i wari planti na seksek nogut. Ol i tok, "Dispela smok hia i kirap klostu long diwai tambu. Nating (i go moa long pes 13)

WINIM MANI ISI TUMAS

PAINIM NA KISIM OLPOLA TAIA I KAM  
MIPELA DUNLOP I SAVE BAIM

**DUNLOP**

FAI Aincaps Rot Klostu long maket

# Stori Tumbuna

(i kam long pes 9)

## MADANG PLENING WOKSAP

Mista Kaki Angi, presiden bilong Madang provin sal eria autoriti, i tok save long ol i laik putim wanpela woksap long 11 inap 13 Epril bilong redim ol samting long kisim provin sal gavman. Ol i laik skul tru long painim gutpela we bilong mekim provins i go het, na bilong rausim ol samting i pasim rot bilong go het bilong ol.

Ol i singautim olkain pipel bilong olkain grup, na klap, na misin, na lokal gavman kaunsil, na bisnisman, na ol man bilong wok politik.

## NO HARIM EDVETAIS

NBC i bin raun long 13 viles klostu long Goroka na Maun Hagen long painimaut sapos ol pipel i harim ol edvetais ol NBC i save salimaut i go long stesin bilong en long Port Moresby. Na ol i bin painim olsem:

a.) Long 130 famili, hap

tasol i gat redio.

b.) Ol pipel i laik harim lokal stesin bilong ol na maski long Moresby.

c.) Ol pipel i bin harim ol edvetais long redio, ol i no inap kolim nem bilong wan wan samting redio stesin i tra'im long salim.

Ol NBC ripota i bin painimaut tu, ol pipel long dispela 130 famili i yusim mani bilong ol olsem wanem. Olsem tasol:

a.) 45 famili i save baim rais

b.) 40 famili i save baim tabak na sigaret

c.) 15 famili i save baim bia na loliwara

d.) 65 famili i tok, sapos ol i gat K500, bai ol i statim wanpela bisnis. Bihain ol i yusim mani olsem: long baim kaikai, klos, na skul fi.

e.) 30 famili i tok bai ol i baim pik

f.) 20 i tok bai ol i mekim pati, na 20 i tok bai ol i putim mani long beng

g.) 15 famili i tok bai ol i putim olsem mani bilong baim meri.

h.) 7 famili i tok bai ol i baim ka.

Dispela pisin i go klostu long ol. Ol i tingting pisin i go klostu na ol i laik kilim em. Tasol em i go isi. Ol i raun, tasol em i go yet. Olsem tasol ol i mekim mekim i go yet.

Tasol 4-pela meri i sotwin na lusim. Wanpela meri tasol i bihainim em i go yet. Dispela taragau em i jerekim ol meri. Olsem nau em i kisim wanpela meri i go long haus na em i givim long brata bilong em Pandaiakali Leli. Dispela man em i laikim tru dispela meri, taragau i bin karim em i kam. Em i kolim nem bilong meri Litin Puim.

Na Pandaiakali na Litin Puim i marit. Na taragau em yet i kolim nem bilong man na meri. Ol i poroman gut tru na slip i stap long dispela maunten Kemane-manda. Dispela man wantaim taragau tupela i save go long bus na painim kapul na karim i kam long haus na mumu na kaikai stap.

Wanpela de man ya wanpela i go long bus inap

long 3 mail. Olsem meri wantaim taragau tasol i stap long haus. Meri em i tokim taragau olsem: "Yu go na painim brata bilong yu."

Em i bekim tok: "Mi les. Em bai inap kam long haus. Yu no ken wari tumas." Pisin i tok olsem long meri.

Man, meri i belhat na i makim pisin taragau long wanpela kain stik ol meri save rausim kaukau long en. Taragau i guria guria i stap. Em i krai-krai i stap.

Man i kam bek pinis long haus, na taragau i autim wari bilong em long ol samting meri i bin mekim long em. Man i harim stori na tu em i lukim taragau i krai stap, na em i kirap paitim meri nogut tru.

Taragau i givim tok long meri olsem: "Olgeta pisin inap long harim tok bilong man, meri na pikinini. Tasol yu krosim mi, na mi bai tokim ol arapela pisin. I no gat wanpela man i kisim yu i kam hia na

maritim Pandaiakali Lela. Mi yet mi kisim yu i kam. Tasol yu kros tumas long mi, orait, mi go na tokim ol arapela pisin. Ol tu inap long pret long yupela manmeri. Mi tu pret long yupela. Mi givim wanpela gras bilong mi long man bilong yu. Em i ken putim i stap long taim bilong singsing na taim bilong moka.

Dispela gras bilong pisin taragau mipela Enga i save putim nau long taim bilong singsing na Moka. Olsem na taragau i go na i wail pinis long bus. Olsem na tude olgeta pisin i no harim tok bilong pipel. Olgeta ol i pret. Taragau i tambu na ol liklik pisin ol i harim tok bilong em, na ol i save long mipela man na meri. Na olsem tasol na ol pisin i pret long mipela.

Thomas P. Tum,  
C.M., Tsak Pumakos,

Sapos yu laitim rot bilong narapela man, yu laitim bilong yu tu wantaim.



## THE INVESTMENT CORPORATION OF PAPUA NEW GUINEA



Long poto antap yumi ken lukim sampela man bilong Tari long Saten Harilans i sanap holim winmani ol i bin kisim long Invesmen Koporesen ofis klostu long ol.

BAIM SEA LONG INVESEMEN KOPORESEN  
BILONG PAPUA NIUGINI

na bai yu kisim winmani bilong wanpela  
bikpela bikpela kampani tru

Sapos yu laik save moa long we bilong kisim  
winmani, yu rait long: Investment Corporation  
P.O. Box 155  
Port Moresby

NEM BILONG YU: .....

ADRES BILONG YU: .....

.....



# Hamaija

(i kam long pes 11)

em tasol i paia. Sapos em i paia, bambai bikpela trabel moa i kamap. Na kwiktaim ol i lusim wok na ran i go bek long ples. Sapos diwai tambu i paia, bambai mipela olgeta indai."

Ol i kamap long ples na ol i winsot tru. Tru tumas, em diwai tasol i paia, na ol i pret nogut tru. "Husat i laitim? Husat i mekim?" Ol i askim nabaut. Kwiktaim ol i subim kanu i go long Brugonovi. Hia tu oli askim ol pipel. Nating wanpela man bilong Brugonovi i kukim dispela diwai tambu bilong mipela. Tasol i no gat man i mekim.

Hamaija? Nating Hamaija i mekim? Nogat, no ken. Hamaija i stap long haus


skul. Ol i go bek long Yessan. Wari i kaikaim bel bilong ol. Ol i kam klostu long ples diwai i stap long en, nau i no gat moa. Paia i pinisim em tru na liklik smok tasol i kirap long pipia bilong em. Pul bilong ol i wok hariap moa long wanem ol i pret long dispela ples na ol i laik lusim kwiktaim.

*Poto long raithan i soim sampela memba bilong palamen i sanap ausait long haus palamen long Melbourne, Australia. Kirap long lephan: Mista Sam Tulo (N.Solomons), Aoka Doi (Ijivitari), Roy E- vera (Kikori), Angmai Bilas (Madang), Opai Kunangel (S.Wahgi)*

*Poto long Norman Plant bilong Australian Information Service.*



# PNG



**Sapos yupela laik kirapim bisnis bilong prinim pepa kam lukim mipela long PNG Printing na bai mipela halivim yupela**



## Koki i stori

# man o meri ?

Wanpela taim i gat tupela man i stap. Nem bilong tupela Trausis na Laplap. Tupela i no save husat i man na husat i meri. Wanpela apinun tupela i waswas, bihain long waswas tupela i kam bek long haus na painim malo bilong tupela i no stap. Nau tupela i kros nogut tru namel long tupela yet.

Wanpela Koki i kam na tokim tupela, watpo yutupela i kros? Narapela i tok, mi laik kamap man na narapela i tok mi laik kamap meri. Tasol Koki i tok mi bai givim malo long yutupela. Koki i kirap na givim trausis long Laplap na laplap em i givim long Trausis.

Nau Koki i tokim tupela olsem, nau ai bilong yutupela i op na lukim yutupela yet. Husat i werim trausis na husat i werim laplap? Laplap i tok, mi werim trausis, na Trausis i tok mi werim laplap.

Koki i tokim tupela nau yutupela i mas save olsem, husat bilong yutupela i werim trausis em i man na husat i werim laplap em i meri.

Tasol wanpela samting i rong namel long tupela em i olsem: Laplap i tokim Trausis olsem, yu no wari Trausis olsem, yu no wari Trausis, mi ken werim yu, na Trausis i tokim Laplap olsem, yu no wari mi ken werim yu.

I kam inap yumi long dispela taim man i werim trausis na meri i werim trausis. Na tu meri i werim laplap man tu i werim laplap. Husat i win long dispela resis? Laplap o Trausis i winim resis?

( Dispela stori mipela i kasim long "Ik Sepik Nius" )



# Strong Tru.

# HUSKY DYNA

**Niupela trak bilong Toyota i save wok hat tru.  
Yu laik karim kago o pasindia – long biktaun  
o rot nogut long bus – dispela trak em inap.**

# TOYOTA

BRANCHES AT: PORT MORESBY 25 4088 LAE 42 2322 MT. HAGEN 52 1888

**ELA MOTORS LIMITED**

MADANG 82 2188

RABAU 92 1988

KIETA 95 6083

WEWAK 86 2255

GSP ET 013P

**LONG FAMILI**  
(Namba 14: 10 - 16:5)


bun na i no ken pret long go pait wantaim Kenan. Tasol ol arapela skaut i pret na i tanim bel bilong ol pipel egens long Josua na Keleb.



Goan yumi paitim Josua

Tasol wantu.....

Lukim - haus sel bilong God i paia



Yupela i no ken pret. Haus sel i no paia. Em i lait tasol bikos God i stap toktok wantaim Moses.


Insait long haus sel bilong God

Moses i kam ausait long haus sel na ol pipel i sarap i sanap i stap. Moses i putim han i go antap

God Papa, yu no ken kros long ol pipel. yu no ken larim ol i bagarap. Ol i bin mekim rong, tasol yu marimari....



Bikos yupela i pret long go insait long kantri God i bin promisim yupela, orait God i tok, yupela bai raun raun tasol long ples wesan nating....



Go bek long ples wesan? Nogat tro

Yu min, mipela yet i mas kisim Kenan?



Maski long ol arapela man, yumi inap long kisim Kenan.

Mi go tu. Yesa, yumi go..



Used by permission of the David C. Cook Foundation. Copyright 1973. David C. Cook Publishing Co. All rights reserved.

... i go bek tokim Moses



Yu ken go bek long ples wesan, tasol mipela nogat. Mipela go long Kenan stret.

God i no stap wantaim yupela, olsem bai yupela i lus.



Yu wet.

Ol i bungim wanpela ami na kwiktaim ol i go pait wantaim Kenan.



Bipo mipela i bin rausim ol stilman, mipela inap long Kenan.

Na maski long tok bilong Moses.

Ol i goapim wanpela liklik maunten, na wantu ol birua i kam pait wantaim ol.



Kwiktaim pait i pinis na ol Isrel i kuk pinis na i sem i kam bek long kem

Lukaut, ol i kilim mipela

Olsem wanem? Olaboi, ol birua i kamap long olgeta hap na i ranim mipela tru. Ol lida bilong mipela ol i ranawe hariap moa.

Hariap, yumi ranawe sapos yumi inap.



Wantaim moa ol pipel i lukim bekim bilong ol man i sakim tok bilong Moses.

Orait, nau wanpela man nem bilong em Kora, na sampela arapela helpman bilong haus sel i no laikim Moses i lida bilong ol.

Kora na ol poroman bilong em i go long Moses...na Moses i singautim ol pipel i kam long kibung.

Mipela inap long Moses. Watpo em i bosim mipela?

Yumi tokim Moses, mipela inap bosim mipela yet



Tumofa bai God i soim yumi em i bin makim husat i lida.



# SPIT NA SPAK I KILIM MAN

LUKIM GUT DISPELA POTO OL PLISMAN I KISIM



# NOGUT NEKS TAIM EM I YU TASOL